

四庫全書

子部

欽定四庫全書

太平御覽卷一百四十二

宋 李昉等 撰

皇親部八

蜀

先主甘后

穆后

後主張后

小張后

吳

孫堅吳后

孫權步后

二王后

潘后

謝妃

徐妃

孫亮全后

孫休朱后

孫皓母何太后

孫皓滕后

前趙

劉淵母呼延后

劉淵張后

劉聰呼延后

二劉后

劉暉劉后

後趙

石勒劉后

後燕

慕容垂段后

宋

劉裕臧后

胡婕妤

劉義隆袁后

劉駿母路后

劉駿王后

劉彧母沈婕妤

劉彧王后

陳妃

劉昱江后

劉準母陳昭華

劉準謝后

蜀先主甘后

蜀志曰先主甘皇后沛人產後主值曹公軍至追先主於當陽長坂于時困逼棄后及後主賴趙雲保護得免於難后卒追諡皇思夫人遷葬於蜀未至而先主殂殞

丞相亮上言皇思夫人宜號昭靈皇后與大行皇帝合葬制曰可

穆后

蜀志曰先主穆皇后陳留人也后之兄素與劉焉有舊是以舉家隨焉入蜀焉有異志而聞善相者使相后云當大貴焉時將子瑁自隨遂為瑁納后瑁死寡居先主既定益州而孫夫人還吳羣下勸先主聘后先主疑於與瑁同族法正進曰論其親疎何與晉文之於子圉乎

於是納后延熙八年薨合葬惠陵

後主張后

蜀志曰後主敬哀皇后車騎將軍張飛長女章武元年
納為太子妃建興元年立為皇后

小張后

蜀志曰後主張皇后飛小女隨後主遷於洛陽

吳孫堅吳后

吳志曰孫堅吳夫人權母也本吳人徙錢塘早失父母

與弟居孫堅聞其才貌欲娶之吳夫人親戚嫌堅輕狡將拒婚焉堅甚慚恨夫人謂親戚曰何愛一女以取禍乎如有不遇命也於是遂許為婚生四男一女及權少年統業夫人助理國政甚有補益建安四年臨薨引見張昭等囑以後事

孫權步后

吳志曰吳主權步夫人臨淮淮陰人也以美麗得幸於權寵冠後宮夫人性不妬嫉多所推進故久見愛權為

王及帝意欲以為后羣臣議在徐氏權依違者十餘年然宮內皆稱皇后親戚上疏稱中宮及薨臣下緣權旨請追正名號乃贈皇后印綬

二王后

吳志曰吳主權王夫人瑯琊人也夫人以選入宮得幸生孫和立為后而全公主素憎夫人數加譖毀及權寢疾言有喜色由是權深責怒以憂死

吳志曰吳主權王夫人南陽人也生孫休及和為太子

和母為后貴姬有寵者皆出居外夫人出在公安卒因葬焉
休即位遣使追尊曰敬懷皇后改葬敬陵

潘后

吳志曰吳主權潘夫人會稽句章人父為吏坐法死夫
人與姊俱輸織室權見而異之召充後宮得幸有身夢
有以龍頭授已者已以蔽膝受之遂生孫亮十三年亮
立為太子明年立夫人為皇后性險妬容媚自始至卒
譖害甚眾權不豫夫人使問中書令張昭后專制故事

侍疾疲勞因以羸病諸宮人伺其昏卧共縊殺之託言中惡後事泄坐死者六七十人權尋薨合葬蔣陵

謝妃

吳志曰吳主權謝夫人會稽山陰人也權聘以為妃愛幸有寵後權更納妃徐氏欲令謝下之謝不肯由是失寵早卒

徐妃

吳志曰吳主權徐夫人吳郡富春人也初適同郡陸尚

尚卒權聘以為妃使母養子登後權以夫人妬忌廢之
尋以疾卒

孫亮全后

吳志曰孫亮全夫人全尚女也立為皇后孫綝廢亮為
會稽王隨亮之國

吳錄曰亮妻患解有容色居侯官吳平乃歸永安中卒
孫休朱后

吳志曰孫休朱夫人朱據女孫綝廢亮立休永安五年

立夫人為皇后休卒羣臣尊夫人為皇太后孫皓即位
月餘貶為景皇后稱安定宮甘露元年見逼薨合葬定

陵

孫皓母何太后

吳志曰孫和何姬丹陽句容人也父遂本騎士孫權嘗
遊幸諸宮而何姬觀於道中權望見異之命宦者召入
以賜子和生男權喜名之曰彭祖彭祖即皓也孫亮即
位和居新都遣使賜嫡妃張氏曰殺何姬曰若皆從死

誰當養孤遂撫育皓及其三弟皓即位尊和為昭獻皇帝何姬為昭獻皇后月餘進為皇太后

孫皓滕后

吳志曰孫皓滕夫人故太常胤之族女也胤夷滅夫人父牧以疎遠徙邊郡孫休即位大赦得還以牧為五官中郎皓既封烏城侯聘牧女為妃皓即位為皇后封牧高密侯拜衛將軍錄尚書事時人以牧尊戚頗推令諫諍而夫人寵漸衰皓滋不悅皓母何恒左右之又太史

言於運歷后不可易皓信巫覡故得不廢常供養昇平
宮長秋宮僚備員而已受朝賀表疏如故皓內諸寵姬
佩皇后璽綬者多矣天紀四年隨皓遷於洛陽

前趙劉淵母呼延妃

崔鴻十六國春秋前趙錄曰左賢王妃呼延氏魏嘉
平中祈于於龍門俄而一大白魚頂有二角掀鬣躍鱗
於龍門而至於祭所久之乃去巫覡皆異之曰此嘉祥
也其夜夢旦所見魚變為人左手把一物大如半雞子

光影非常以授氏曰此是日精服之生貴子自是十三月而生淵

劉淵張后

崔鴻十六國春秋前趙錄曰劉淵皇后張氏夢日入懷寤而告淵曰吉徵也慎勿言之自是十五日而生聰
劉聰呼延后

崔鴻十六國春秋前趙錄曰劉聰皇后呼延氏淵后之從父妹有美色恭孝稱於宗族淵后愛聰姿色故以

配焉聰以弟又為帝太弟后謂聰曰父終子紹古今之大典太弟何為者哉陛下百年後絜兄弟必無種也願陛下深思之聰亦信之曰然吾當為計后曰事久變生太弟見絜兄弟並大必有不安之志矣或有小人構間其中未必不禍發今日妾聞陛下說隱公事一何相似竊為陛下寒心聰深然其言於是相圖之計起矣

大劉后

崔鴻十六國春秋前趙錄曰劉聰皇后劉氏殷長女

也宇麗芳以貴嬪立為皇后聰將起鷄儀殿廷尉陳元
達諫聰大怒將斬之后時在後堂聞而密遣中常侍勅
左右停刑於是手疏曰伏聞勅旨將為妾營殿今四海
未一禍難猶繁廷尉之言社稷之計當賞美爵而反欲
誅之陛下此怒由妾而起廷尉之禍由妾而招自古國
敗家喪未始不由婦人妾每博覽古事忿之不已何意
今日妾自為之後人觀妾猶妾之視前人復何面目仰
侍中櫛請歸死此堂以塞陛下誤惑之過聰覽之變色

大司徒任顓等復叩頭固請乃徐曰朕比來微得風疾
喜怒過差元達忠臣也命顓等冠履就坐引元達以后
表示之曰外輔如公等內輔如此后朕復何憂

小劉后

崔鴻十六國春秋前趙錄曰聰后劉氏殷小女字麗
華童齒聰慧膚髮異常晝營女工夜誦書傳母每止之
敦翫彌甚與諸兄弟辨論經義理致超然兄常深嘆性孝
友善風儀進止如珪璋焉以貴嬪立為皇后殷二女四

孫皆姿色超世女德冠時聰並納之自是六劉之寵傾
於後宮建元中流星起於牽牛入紫微龍形委蛇其光
照地落平陽北十里視之則肉臭聞於平陽肉傍常有
哭聲晝夜不止聰甚惡之劉后產一蛇一虎各害人而
走尋之不得頃之見在隕肉之傍劉后卒乃失此肉哭聲
亦止偽謚武宣皇后

劉曜劉后

崔鴻十六國春秋前趙錄曰劉皇后侍中愷女年十

三長七尺八寸垂手過膝髮與身齊才德姿色邁於別宮

後趙石勒劉后

崔鴻十六國春秋後趙錄曰石勒劉皇后侍中閨之妹後部胡人也勒納之于胡關美色有特寵張裨反于襄城后抽劍斬之勒賴后而濟后敏慧有幹畧助理軍國之務有呂氏輔漢之風然嚴整貞婉不妬忌尤過之也石弘即位尊為皇太后與彭城王堪謀殺石虎謀泄

虎殺之

後燕慕容垂段后

崔鴻十六國春秋後燕錄曰垂皇后段氏字元妃光祿大夫儀之女后少而婉慧有節操嘗謂妹李妃曰我終不能為庸人之妻李妃曰妹亦不為庸人之婦隣人聞而笑之內黃人張定善相見儀二女大驚曰君家大興當由二女儀深異之至年二十餘而不嫁儀子倫謂儀曰張定何知而拒求者儀曰吾女輩志行不凡故且

跼蹐以擇良配垂稱燕王乃納元妃為繼室遂有殊寵
范陽王德亦聘李妃姊妹共為皇后卒如其言

宋劉裕臧后

沈約宋書曰武敬臧皇后諱愛親東莞人也后適高祖
生會稽宣長公主高祖以儉正率下后恭敬不違及高
祖復興晉室居上相之重而后器服粗素不為親屬請
謁晉義熙四年正月甲午殂於東城年四十八歲追贈
豫章公夫人還葬丹徒

胡婕妤

宋書曰武帝胡婕妤諱道女淮南人義熙初為高祖所納生文帝五年被譴賜死時年四十二高祖踐祚追贈婕妤太祖即位上尊號曰章皇太后

劉義隆袁后

沈約宋書曰文帝袁皇后齊媯陳郡陽夏人左光祿大夫湛之庶女適太祖初拜宜都王妃生太子劭及東陽獻公主英娥上待后恩甚篤袁氏貧薄后每就上求錢

帛以贍與之上性節儉所得不過三五萬三五匹後潘妃
有寵所求無不得后乃因潘妃求三十萬信妃便得因
此恚恨甚深稱疾不復見上上每入必他處迴避上數
掩伺之不能得疾篤上執手流涕問所欲言后視上良
久乃引被覆面崩於顯陽殿時年四十六上甚悼痛之
詔永嘉太守顏延之為哀策文其文甚麗

劉駿母路后

沈約宋書曰文帝路淑媛諱惠男丹陽建康人也以色

貌選入後宮生孝武帝拜為淑媛年既長無寵乃隨世
祖出藩世祖入討元凶淑媛留尋陽及上即位有司奉
尊號曰皇太后太后弟子瓊之上表為父乞恩贈給事
中瓊之及弟休之茂之並超顯職太后頗預政事賜與
休之等財物家累千金居處器服與帝子相侔尋崩時
年五十五遷殯東宮改東宮門題曰崇憲宮

劉駿王后

沈約宋書曰孝武文穆王皇后諱憲嫺瑯琊臨沂人元

嘉二十年拜武陵王妃生廢帝山陰公主世祖在藩后甚有寵上伐凶逆與太后同還京都立為皇后文明四年率六宮躬桑於西郊廢帝即位尊曰皇太后宮曰永順其年崩於含章殿時年三十八祔葬景陵

劉彧母沈婕妤

沈約宋書曰文帝沈婕妤諱容姬納於後宮為美人生明帝拜為婕妤元嘉三十年卒時年四十世祖即位追贈湘東國太妃太宗即位上尊號為皇太后

劉彧王后

沈約宋書曰明恭王皇后諱貞風瑯琊臨沂人也上嘗
宮內大集而裸婦人觀之以為歡笑后以扇障面獨無
所言帝怒曰外舍家寒乞今共為笑樂何獨不視后曰
為樂之事其方自多豈有姑姊妹集聚而裸婦人形體
以為樂外舍之為懼適實與此不同帝大怒遣后令起
廢帝即位尊為皇太后元徽五年五月五日太后賜帝
玉柄毛扇帝嫌其毛柄不華因此欲加酖害已令太醫

菴藥左右止之曰若行此事官家便應作孝子豈復得
出入狡獪帝曰汝語大有理乃止順帝即位齊王秉權
順帝禪位太后與帝遊於東邸孝建元年薨於第時年
四十四

陳妃

沈約宋書曰明帝陳貴妃諱妙登丹陽屠家女也太妃
家在建康縣東家貧有草屋二三間上出見之賜錢三
萬令起瓦房尉自送錢與之家人並不在唯太妃在家

時年十二三尉見其容質甚美即以白世祖於是迎入宮賜太宗始有寵一年許衰歇以乞將軍李道兒尋又迎還生廢帝故民中皆呼廢帝為李氏子廢帝踐祚號曰皇太妃輿服一如晉孝武太妃故事置家令一人改諸國太妃曰太姬

劉昱江后

沈約宋書曰後廢帝江皇后諱簡珪濟陽考城人太始五年太宗訪求太子妃而雅信小數名家女多不合后

弱小門無強蔭以下筮最吉為太子納焉太子即位立為后帝既廢降為蒼梧王妃

劉準母陳昭華

沈約宋書曰明帝陳昭華諱法容丹陽人也太宗晚年諸弟姬人有懷孕者輒取入宮及生子殺其母而與六宮所愛者養之順帝桂陽王休範子也以昭華為母焉順帝即位進為皇太妃

劉準謝后

沈約宋書曰順帝謝后諱梵竟光祿大夫莊孫女也昇
明二年立為皇后順帝禪位降為汝陰王妃

太平御覽卷一百四十二

欽定四庫全書

太平御覽卷一百四十三

宋 李昉等 撰

皇親部九

齊

蕭道成母陳后

蕭道成劉后

蕭昭業母王后

蕭昭業何妃

梁

蕭衍母張后

蕭衍郅后

丁貴嬪

阮修容

蕭經王后

蕭繹徐妃

陳

陳霸先章后

陳蒨沈后

陳頊柳后

陳叔寶沈后

張貴妃

北齊

高歡婁后

尒朱太妃

高澄元后

高洋李后

高演元后

高湛胡后

高緯斛律后

齊蕭道成母陳后

蕭子顯齊書曰宣孝陳皇后諱道止臨淮東陽人后生
太祖太祖年二歲乳媪乏乳夢人以兩甌酥粥與之覺
而乳大出異而悅之宣帝從任在外后嘗留家治事教

子孫有相者謂后曰夫人有貴子而不見之后歎曰我三兒誰當應之呼太祖小字曰正應是汝太祖雖從宦而家業本貧為建康令時高宗等冬月猶無緜纊而奉膳甚厚后每撤去無肉曰我於此過足矣殂於縣舍年七十三建元元年追尊孝皇后

蕭道成劉后

蕭子顯齊書曰高昭劉皇后諱智容廣陵人也父壽之員外郎后母桓氏夢吞玉勝生后時有紫光滿室后寢

卧家人常見上有雲氣焉年十七適太祖嚴整有禮法
家庭肅然宋泰豫元年殂葬宣帝墓側今泰安陵也門
生王清與墓工始下鋪有白兔跳起尋之不得及墳成
兔還棲其上建元元年尊謚昭皇后

蕭昭業母王后

蕭子顯齊書曰文安王皇后諱寶明琅琊臨沂人建元元
年為南郡王妃四年為皇太子妃無寵太子為宮人製新
麗衣裳及首飾而后牀帷陳設故舊釵鐻十餘枝永明十

一年為皇太妃鬱林王即位尊為皇太后稱宣德宮

蕭昭業何妃

蕭子顯齊書曰鬱林王何妃諱婧英廬江潯人撫軍將軍戢之女后將拜鏡在牀無故墮地其冬與太后同日謁太廟后稟性淫亂為妃時與人姦通左右楊珉之與寢處如伉儷又與帝相愛褻故帝恣之迎后親戚入宮賞賜人數十萬以世祖耀靈殿處后家屬帝被廢后貶為王妃

梁蕭衍母張后

梁書曰太祖獻皇后張氏諱尚柔范陽方成人也祖次
惠宋濮陽太守后母蕭氏即文帝從姑宋元嘉中嬪於
太祖生長沙宣武王懿永陽昭王敷次生高祖初后嘗
於室內忽見庭前菖蒲生花光彩照灼非世中所有驚
視謂侍者曰汝見不對曰不見后曰嘗聞見者當富貴
因遂取吞之是月產高祖將產之夜后見庭內若有衣
冠陪列焉次生衡陽宣王暢義興昭公主令嫔宋泰始

七年殂於秣陵縣同夏里合葬武進縣東城里山天監元年五月甲辰追上尊號為皇后謚曰獻

蕭衍却后

高祖德皇后却氏諱徽高平金鄉人也祖紹宋國子祭酒領東海王師父暉太子舍人早卒初后母尋陽公主方娘夢人云當生貴子及生后有赤光照於室內器物盡明家人皆怪之巫言此女光高將有所妨乃於水濱被除之后幼而明慧善隸書讀史傳女工之事無不嫻習

宋後廢帝將納為后齊初安陸王緬又欲結婚郗氏並
辭以女疾乃止建元末高祖始聘焉生永興公主玉姚
永世公主玉婉永迎公主玉環建武五年高祖為雍州
刺史先之鎮後乃迎后至州未幾殂於襄陽官舍時年三
十二明年歸葬南徐州武進縣二年齊朝進高祖位相
國封梁公詔贈后為梁公妃高宗踐祚追崇為皇后

丁貴嬪

梁書曰高祖丁貴嬪諱令先譙國人也世居襄陽貴嬪

生於樊城初產有神光之異紫烟滿室故以為名相者云此女當大貴高祖臨州丁氏因人以聞嬪時年十四高祖納焉初貴嬪生而有赤痣在左臂治之不滅至是無何忽失所在事德皇后小心禮敬嘗於供養經案之側髣髴若見神人心獨異之高祖義師起昭明太子始誕育貴嬪與太子留在州城京邑平乃還京都天監元年五月有司奏為貴人未拜其年八月又為貴嬪位在三夫人上歸於顯陽殿

阮修容

高祖阮修容諱令羸本姓石會稽餘姚人也齊始安王
遙光納焉遙光敗後入東昏宮建康城平高祖納為采
女天監六年八月生世祖尋拜為修容常隨世祖出藩
大同六年六月薨於江州內寢時年六十七歸葬江寧縣
通望山謚曰宣世祖即位追崇為文宣太后

蕭經王后

梁書曰太宗簡皇后王氏諱靈賓琅琊臨沂人也祖儉

太尉南昌文憲公后幼而柔明淑德叔父暕見之曰吾家女師也天監十一年拜晉安王妃生哀太子大器南郡王大連長山公主妙碧大通三年十月拜皇太子妃太清三年三月薨於永福省時年四十五其年太宗即位追崇為皇后謚曰簡太寶元年九月葬莊陵

蕭繹徐妃

梁書曰元帝徐妃諱昭佩東海郟人也祖孝嗣齊太尉枝江文忠公父緄侍中信武將軍妃以天監十六年十

二月拜湘東王妃生世子方等益昌公主含貞妃無容
質不見禮帝三二年一入房妃以帝眦一目每知帝將
至必為半面粧以俟帝見則大怒而出妃性嗜酒多洪
醉帝還房必吐衣既而貞惠世子方諸母王氏寵愛未
幾而終元帝歸咎於妃及方等死愈見疾太清三年遂逼令
自殺妃知不免乃投井死帝以屍還徐氏謂之出妻葬
江陵瓦官寺

陳霸先章后

陳書曰高祖宣皇后章氏諱要兒吳興烏程人也本姓
鈕父景明為章氏所養因改姓焉景明梁代官至散騎
侍郎后母蘇氏嘗遇道士以小龜遺已光彩五色曰三
年有徵及期后生而紫光照室因失龜所在后少而聰慧
美容儀手爪長五寸色紅白每有替功之服則一爪先
折善書計能誦詩及楚辭高祖自廣州南征交趾命后
與衡陽王昌隨世祖由海道歸於長城侯景之亂高祖
下至豫章后為侯景所囚景平高祖為長城縣公后拜

夫人及高祖踐祚永定元年立為皇后高祖崩后與中書舍人蔡景厯定計秘不發哀召世祖入纂世祖即位尊后為皇太后令黜廢帝為臨海王命高祖嗣位大建元年冊尊后為皇太后二年三月甲申崩於紫極殿時年六十五

陳禧沈后

陳書曰世祖沈皇后諱妙容吳興武康人也父法深梁安州錄事后期十餘歲以梁大同中歸於世祖高祖之

討侯景世祖時在吳興景遣使叔世祖及侯景平乃獲免高祖踐祚永定元年后為臨川妃世祖即位立為皇后

陳頊柳后

陳書曰高祖柳皇后諱敬言河東解縣人也曾祖世隆侯景之亂與弟盼往江陵依梁元帝帝以長城公主故恩遇甚厚及高祖赴江陵元帝以后配焉承聖二年后生後主於江陵明年江陵陷高祖遷於關右后與後主留襄

城天嘉二年與後主還朝后為安城王妃高祖即位立為皇后后美姿容身長七尺二寸手垂過膝初高祖居鄉里先娶吳興錢氏女及即位拜為貴妃甚有寵幸后傾心下之每尚方供奉之物其上者皆推於貴妃而已御其次焉高祖崩始興王叔陵為亂後主賴后與吳媪救而獲免後主即位尊后為皇太后宮曰弘範當此之時新失淮南之地隋師臨江又國遭大喪後主病瘡不能聽政其誅叔陵供大行喪事邊境防守及百司衆務

雖假以後主之命實皆決之於后後主瘡愈乃歸政焉
陳亡入長安隋大業十一年薨於東都時年八十三葬於
洛陽之邙山

陳叔寶沈后

陳書曰後主沈皇后諱婺華儀同三司憲侯君理女也
母高祖女會稽公主主早亡時后尚幼而毀瘠過甚服
畢每至歲時朔望恒獨坐涕泣哀慟左右內外咸敬異
焉大建三年納為皇太子妃後主即位立為皇后后生

性端靜寡嗜慾聰敏強記涉獵經史工書翰初後主在東宮而后父君理卒后居憂處別殿哀毀逾禮後主遇既薄而張妃寵傾後宮後宮之政並歸之后澹然未嘗有所忌怨而居處儉約衣服無錦繡之飾左右近侍纔百許人唯尋閱圖史佛經為事陳亡與後主俱入長安及後主薨后自製哀辭文甚酸切隋煬帝每巡幸恒令從駕及煬帝為宇文化及所害后自廣陵過江還鄉里不知所終

張貴妃

陳書曰後主張貴妃名麗華兵家女也家貧父兄以織
席為業後主為太子選入宮是時龔貴嬪為良娣貴妃
年十歲後主見而悅焉因得幸遂有娠生太子深後主
即位拜為貴妃妃性聰慧甚被寵遇後主每引見貴妃
與賓客遊宴貴妃薦諸宮女預焉後宮等咸德之競言
貴妃之善由是愛傾後宮又好厭魅之術假鬼道以惑
後主置淫祠於宮中聚諸妖巫使之鼓舞因叅訪外人

間有一言一事妃必知之以白後主由此益重妃內外宗族多被引用及隋軍陷臺城妃與後主俱入井隋軍出之晉王廣命斬妃於青溪中橋

北齊高歡妻后

北齊書曰武明皇后婁氏諱昭君贈司徒內干之女也少明悟強族多聘之並不肯行及見神武於城上執役驚曰此真吾夫也乃使婢通意又數致財使以聘已父母不得已而許焉神武既有澄清之志傾產以結英豪

密謀秘策后恒叅預及拜渤海王妃閹闈之事悉決焉
后高明嚴斷雅遵儉約往來外舍從不過十人性寬厚不妬
忌神武姬侍咸加恩待神武嘗將西討出師后夜驟生
一男一女左右以危急請追告神武后弗聽曰王出統
大兵何得以我故輕離軍幕死生命也來復何為神武
聞之嗟嘆良久沙苑敗後侯景言請精騎二萬必能取
之神武悅以告於后后曰若如其言豈有還理得獮失
景亦有何利乃止文襄嗣位進為太妃文宣將受魏禪

后固執不許帝所以中止天保初尊為皇太后宮曰宣
訓濟南王即位尊為太皇太后尚書令楊愔等受遺詔
輔政踈忌諸王太后密與孝昭及諸大將定策誅之令
廢立孝昭即位復為皇太后孝昭帝崩太后又下詔立
武成帝大寧二年春太后寢疾衣忽自舉用巫媪言改
姓氏四月辛丑崩於北宮年六十二合葬義平陵

尔朱太妃

北齊書曰彭城太妃尔朱榮之女魏孝莊后也神武納

為別室敬重踰於婁妃見必束帶自稱下官神武迎蠕
蠕公主還尔朱迎於木井北與蠕蠕公主前後別行不
相見公主引角弓仰射翔鷗應弦而落妃亦引弓仰射
飛鳥亦一發而中神武喜曰此二婦並堪擊賊後為尼
神武為起佛寺天保初為太妃及文宣狂酒將無禮於
太妃太妃不從遂遇禍

高澄元后

北齊書曰文襄敬皇后元氏魏孝靜帝之妹也孝武帝

時封馮翊公主而歸於文襄容德兼美曲盡和敬初生
河間王孝琬時文襄為世子三日而孝靜幸世子第贈
錦綵及布帛萬疋世子辭求通受諸貴禮遺於是十屋
皆滿次生兩公主文宣受禪尊為文襄皇后

高洋李后

北齊書曰文宣皇后李氏諱祖娥趙郡李希宗女也容
德甚美初為太原公夫人及帝建中宮高隆之高德正
言漢婦人不可為天下母宜更擇美配楊愔固請依漢

魏故事不改元妃而德正猶固請廢后而立段昭儀欲以結勲貴之援帝竟不從而立后焉帝好捶撻嬪御乃至有殺戮者唯后獨蒙禮敬天保十年改為可賀敦后孝昭即位降居昭信宮號昭信皇后

高演元后

北齊書曰孝昭皇后元氏開府元蠻女也初為常山王妃天保末賜姓步六孤孝昭即位立為皇后帝崩梓宮之鄴始度汾橋武成間后有竒藥追索之不得使閹人

就車頻辱降居順成宮武成既殺樂陵王元被閹隔不
得與家相知宮闈內忽有飛語帝令檢推得后父兄書
信元蠻由是坐免官后以齊亡入周氏宮中隋文帝作
相放還山東

高湛胡后

北齊書曰武成皇后胡氏安定胡延之女其母范陽盧
道約女初懷孕有胡僧詣門曰此宅瓠蘆中有月既而
生后天保初選為長廣王妃產後主日鷄鳴於產帳上

武成崩尊為皇太后

高緯斛律后

北齊書曰後主皇后斛律氏左丞相光之女也初為皇太子妃後主受禪立為皇后武平三年正月生女帝欲悅光詐稱生男為之大赦光誅后廢在別宮後令為尼

太平御覽卷一百四十三

欽定四庫全書

太平御覽卷一百四十四

宋 李昉等 撰

皇親部十

昭儀

夫人

貴人

婕妤

昭儀

漢書曰武帝制婕妤嬖娥俗華充依各有爵位而元帝

加昭儀之號

漢書曰孝元傅昭儀哀帝祖母也河內人少為上官太后才人元帝進幸有寵為人有才畧善事人下至宮人左右飲酒酌地皆祝延之產一男一女為平都公主男為定陶恭王漢書曰孝元馮昭儀平帝祖母父奉世為執金吾上幸虎園聞獸後宮皆坐熊佚出園攀檻欲上殿左右貴人昭儀等皆驚走馮婕妤直前當熊而立左右殺熊上問人情驚懼何故當前婕妤曰猛獸得人而止妾恐熊至

御坐故身當之元帝嗟嘆以此倍敬重焉男立為信都王

婕妤為昭儀元帝崩為信都太后與王俱居儲元宮

名宮

在長安門西

又曰孝成趙皇后本長安宮人生時父母不舉三日不死乃收養及壯屬陽阿主家學歌舞號曰飛燕帝微行過陽阿主作樂見飛燕而悅之召入宮大幸有女弟復召入俱為婕妤貴傾後官許后廢立為皇后後寵少衰而弟更幸為昭儀居昭陽舍其中庭彤朱殿上髹漆砌皆銅

香冒黃金塗白玉階壁帶往往為黃金紅函藍田璧明珠翠羽飾之後宮未嘗有焉

魏志曰魏因漢法母后之號皆如舊制自夫人以下世有增損太祖建國始命王后其下五等有夫人昭儀婕妤容華美人明帝又置淑妃昭華修儀

後魏書曰世祖昭儀馮氏文明皇后之姑也后父朗坐事誅后遂入宮昭儀雅有母德鞠養教誨年十四高祖踐極選后為貴人皆是昭儀訓撫之力

又曰孝文馮昭儀廢后馮氏之姊也高祖還洛陽恩遇甚厚昭儀先以疾病文明太后遣還家為尼太后崩服終高祖重引為左昭儀至洛稍有寵后禮愛漸衰昭儀自以年長且前入宮掖見待厚規為內主譖搆百端帝遂廢后為庶人昭儀寵愛過初專寢當宮人稀復進見後遂立為皇后

沈約宋書曰漢元帝制昭儀世祖省之晉泰始二年又置昭華昭儀等以備九嬪也

崔鴻十六國春秋前趙錄曰嘉平二年立司空王育女為左昭儀尚書令任覬女為右昭儀

晉書載記曰石勒定昭儀夫人位視上公貴嬪貴人視列侯員各一人三英九華視伯淑媛儀視子容華美人視男務簡賢淑不限員數

西京雜記曰趙后腰體弱美行步進止女弟昭儀不能弱骨豐肌尤善笑語為當時第一皆擅寵後宮

西京賦曰增昭儀於婕妤好賢既公而復侯

唐書曰高宗六年將立昭儀武氏為皇后長孫無忌屢言不可帝復召于志寧等謂曰武昭儀有令德朕欲立為皇后卿等謂如何志寧曰貞觀二十三年後先朝付託褚遂良望陛下問其可否竟不從無忌等言而立昭儀為皇后

夫人

周禮鄭康成注曰夫人之於后猶三公之於王坐而論婦禮無官職

禮記昏義曰古者天子后立六宮三夫人九嬪二十七世婦八十一御妻以聽天下之內治以明章順故天下內和而家理

五經要義曰古者后夫人必有女史彤管之法后妃羣妾以禮御於君所女史書其日月授其環以進退之生子月辰則以金環退之當御者以銀環進之著於左手既御著於右手左手陽也以當就男故著右手陰也既御而復故此女史之職也

史記曰武帝時幸夫人尹媿好邢夫人號媿

徐廣曰媿五更反

秩比中二千石尹夫人邢夫人同時並幸有詔不得相見尹夫人自請武帝許之即令他夫人飾從御者數十人來前尹夫人見之曰非邢夫人身也帝曰何以言之對曰視其身貌形狀不足以當人主於是有詔使邢夫人衣故衣獨身前來尹夫人望見之曰真是矣於是乃低頭俛而泣自痛其不如也諺曰美女入室惡女之仇漢書曰漢興因秦之號妾皆稱夫人有美人良人八子

七子長使少使之號焉

又曰漢王得定陶戚姬愛幸生趙王如意高祖崩惠帝立呂后為皇太后乃令永巷囚戚夫人髡鉗衣赭衣令舂戚夫人舂且歌曰子為王母為虜終日舂薄暮常與死為伍相離三千里當誰使告汝太后遂斷戚夫人手足去眼薰耳飲以瘡藥使居鞠域中名曰人彘

又曰高帝薄姬文帝母也少時與管夫人趙子兒相愛約曰先貴無相忘已而管夫人趙子兒先幸漢王漢王四

年坐河南成臯靈臺此兩美人侍相與笑薄姬初約漢王
問其故兩人具以實對漢王心悽然憐薄姬是日召而幸之
又曰孝武李夫人本以倡進初夫人兄延年性知音善
歌舞孝武愛之每為新聲變曲聞者莫不感動延年侍
上起舞歌曰北方有佳人絕世而獨立一顧傾人城再
顧傾人國寧不知傾城與傾國佳人難再得上嘆息曰
善世豈有此人乎平陽主因言延年有女弟上乃召見
之實妙麗善舞由是得幸生一男是為昌邑哀王李夫人

少而早卒上憐憫焉圖其形甘泉宮齊人少翁言能致其神
迺夜張燈燭帷帳陳酒肉而令上居他帳望見好女如
李夫人之貌不得就視上愈益悲感為作詩曰是耶非
耶立而望之偏何姍姍其來遲令樂府諸音家絃歌之
上自為作賦以傷悼夫人

又曰孝武鈎弋趙婕妤昭帝母也家在河間武帝巡狩
過河間望氣皆言此室有竒女天子亟使使召之既至
兩手皆拳上自披之手即伸由是得幸號曰拳夫人

續漢書曰陳夫人家本魏郡少以聲伎入孝王宮得幸
生質帝以梁氏故榮寵不及焉

魏志曰魏因漢法母后之號皆如舊制夫人以下世有
增損太祖建國始命皇后其下五等有夫人有昭儀有
婕妤有容華有美人明帝增淑妃昭華脩儀太和中始
復命夫人登其位於淑妃之上自夫人以下爵凡十二
等貴嬪夫人位次皇后

魏志曰文德郭皇后有智數時所獻納文帝之為嗣后

有謀焉太子即位后為夫人

王隱晉書曰胡芳以選入宮父奮哭曰老奴不死唯有
二兒男入九地之下女上九天之上後拜為夫人元后
臨終有命先來臨者有賞胡夫人自排人徑前辭訣咸
寧二年立皇后楊氏封父駿臨晉侯漸驕慢奮語駿卿
恃女更豪也與天家作婚者未有不滅門駿曰卿女不
在天家也奮曰我女與卿女作婢耳何能增損
後魏書曰明元昭哀皇后姚興之女太宗以后禮納之

後為夫人后以鑄金人不成未昇尊位然帝寵幸出入居處禮如后焉

晉中興書曰簡文宣皇后鄭氏字阿春滎陽人也先適渤海田氏生一男夫亡后依舅濮陽吳氏中宗為丞相敬后先崩將納吳氏女為夫人后及吳氏女並遊後園有見之者言於中宗曰鄭氏雖嫠居賢於吳氏遠矣遂以德色納為夫人甚有寵

王隱晉書曰晉武採漢魏之制置貴嬪夫人貴人為三

夫人位視三公

晉起居注曰有司奏今月九日當拜鄭夫人后媿好按儀注應服雀釵桂襪

列仙傳曰鈎弋夫人右手拳姿色甚偉帝披其手得一鈎而手尋伸生昭帝既而帝害之殯尸不臭而香數月昭帝既即位更葬之棺空但有絲履故名其宮曰鈎翼後避諱改為弋廟有神祠焉

西京雜記曰高帝戚夫人善鼓瑟擊筑帝擁夫人倚瑟

而絃歌畢泣下流連夫人善為翹袖折腰之舞歌出塞
望歸之曲侍婢數百人皆為之泣後宮齊唱聲入雲霄
又曰戚夫人以百煉金為彊環照見指骨上惡之以賜
侍兒鳴玉曜光等各四枚

又曰戚夫人侍兒賈佩蘭後為扶風人段儒妻說在內
時戚夫人侍高祖常以趙王如意為言高祖思之或半
日不言歎息悽愴而未知其術輒視夫人夫人擊筑高
祖自歌大風詩以和之

又曰武帝以象牙為簞賜李夫人

又曰武帝遇李夫人就取玉簪搔頭自此宮人搔頭皆用玉

貴人

東觀漢記曰光烈陰皇后上即位為貴人上以后性寬仁宜母天下欲授以尊位后輒退讓自陳不足以當大位

又曰章帝宋貴人時竇皇后內寵方盛以貴人名族節

操高妙心內害之欲為萬世之計陰設方畧讒毀貴人
由是母子見踈數月誣奏貴人使婢為蠱道呪詛七年
遂被譖暴卒

又曰孝和陰皇后聰慧敏達有才能善書史永元三年
選入掖庭為貴人託以先后近屬故有寵

後漢書曰順烈梁后永建三年與姑共入掖庭時年十
三太史卜兆得壽房又筮得坤之比遂以為貴人常特被
引御從容請曰願陛下思雲雨之均澤識貫魚之次序

使小妾得免罪謗之累由是帝加敬焉

又曰桓思竇后延熹八年選入掖庭為貴人其冬立為皇后而御見甚稀帝所寵唯采女田聖等永康元年冬帝寢疾遂以聖等九女皆為貴人

東觀漢記曰中貴人生孝穆皇帝趙夫人為穆皇后閔夫人生桓帝既立追謚趙夫人為穆皇后閔夫人為博園貴人和平元年桓帝詔曰博園閔貴人秉高明之懿德乘淑美之嘉會與天合靈篤生朕躬欲報之德詩所

感歎其尊貴人為孝崇皇后

又曰孝桓帝鄧后字猛父香早死猛母宣改嫁為掖庭民梁紀婁紀者襄城君孫壽之舅也壽引進令入掖庭得寵為貴人故冒姓為梁氏

續漢書曰光武郭皇后聖通世祖至真定納聖通有寵世祖即位以為貴人

魏志曰文帝納甄后於鄴有寵生明帝郭后李貴人並愛幸后愈失意有怨言

王隱晉書曰武帝破陳拜諸葛姚為夫人李暉為貴人
後魏書曰文成馮后生有神光之異高祖踐極以馮為
貴人

又曰文成元皇后李氏梁國蒙縣人也母頓丘王峻妹后
之生也有異於常父方叔常言此女當大貴及長姿質
美麗永昌王仁得后後遇事誅后與其家人送平城宮
高祖登白樓望見之謂左右曰此婦人佳乎乃下臺后得
幸於齋庫中遂有娠守庫者亦私書壁記之後驗問皆

生顯祖拜貴人

沈約宋書曰貴嬪文帝所制貴人漢光武制泰始二年
又省貴人置貴姬

媿好

漢書曰媿好視上卿比列侯

又曰孝宣皇帝之為曾孫也暴室嗇夫許廣漢有女平
君年十四五配曾孫數月曾孫立為帝平君為媿好是
時霍將軍有少女與皇太后有親公卿議更立后皆心儀霍

將軍女亦未有言詔求徵時故劍大臣知音白立許媿
好為皇后

又曰孝宣王皇后父奉光少時好鬪雞帝在民間數與
奉光會相識奉光有女年十餘歲每當適人所當適輒
死故不行及宣帝即位召入宮為媿好是時館陶主母華
媿好及淮陽憲王母張媿好楚孝王母衛媿好皆幸皇
后廢上憐許太子早失母幾為霍氏所害於是乃選後
宮素謹慎而無子者遂立王媿好為皇后令母養太子

又曰孝成班婕妤成帝初卽位選入後宮始為少使俄而大幸為婕妤居增成舍再就館有男數月失之成帝遊於後庭嘗欲婕妤同輦載婕妤好辭曰觀古圖書聖賢之君皆有名臣在側三代末主迺有嬖妾今欲同輦得無近似之乎上善其言而止太后聞之喜曰古有樊姬今有班姬

世說曰漢成帝幸趙飛燕譏班婕妤呪詛帝乃考問婕妤對曰妾聞死生有命富貴在天修善不蒙福為邪欲

以何望若鬼神有知不受邪佞之訴如其無知訴之何益故不為也

漢書曰成帝隆於內寵班婕妤進侍者李平得幸立為婕妤上曰始衛皇后亦從微起乃賜平姓曰衛所謂衛婕妤

又曰中山衛姬平帝母也父子豪中山盧奴人官至衛尉子豪女弟為宣帝婕妤妤生楚孝王長女又為元帝婕妤妤生平陽公主成帝時中山孝王無子上以衛氏吉祥以

子豪少女配孝王元延四年生平帝

魏志曰太祖建國始命王后其下有媿妤五等


晉服制令曰媿妤銀印青綬佩采璫玉

婦人集曰漢元帝賜媿妤書曰問飛燕趙媿妤夫上有
誠必應以實憤懣充中必形於色詩云鼓鐘于宮聲聞
于外由此言之真偽之效難以欺矣夫君子貴素文足
通殷勤而已亦何必華辭哉自以親媿妤異於他人故
不能無言亦不以相過望前數以顏色不平應對舒遲

為譴卒不能自改媿好方見親幸之時老母在堂兩弟
皆簪金貂並侍於側同列比舍豈不謂媿好妹弟尊幸
哉今遇蒙譴獨謂老親兩弟何班媿好報諸姪曰託言
屬見元帝所賜趙媿好書以相比元帝被病無惊但鍛
鍊後宮貴人書也類多華辭至如成帝則推誠寫實若
家人夫婦相與書矣何可比也故略陳長短今汝曹自
評之

後魏書曰御史中尉李彪有女幼而聰慧彪每奇之教

書學讀誦經傳會謂所親曰此女當與我家鄉曹各得其力彪亡後世宗聞名納為婕妤在宮嘗教帝妹書誦授經史世宗崩婕妤為比丘尼通習經義法座講說諸僧推重之



太平御覽卷一百四十四

欽定四庫全書

子部

太平御覽卷一百

四十五至
五十

詳校官中書臣金應琦

員外郎臣牛稔文覆勘

總校官降調編修臣倉聖脈

校對官助教臣胡予襄

謄錄監生臣任兆烱

欽定四庫全書

太平御覽卷一百四十五

皇親部十

嬪

女御

才人

女侍中

宋 李昉等 撰

世婦

美人

保林

女尚書

女史

嬪

尚書堯典曰釐降二女于媯汭嬪于虞

詩推度災曰關雎有原冀得賢妃正八嬪

周禮天官內宰曰以陰禮教九嬪

又曰九嬪掌婦學之灋以教九御婦德婦言婦容

婦功各帥其屬而以時御叙于王所

婦嬪也婦德謂貞順也婦言謂

詞令也婦容謂婉婉也婦功謂絲枲也自九嬪以下而御各帥其屬者使亦九九相與從王于所息之燕

寢也羣妃御見之法卑者宜先尊者宜後女御八十一人當九夕世婦二十七人當三夕九嬪九人當一夕夫人三人當一夕后當一夕十五日凡祭祀贊玉盥贊后薦徹豆籩

而徧自望後反之

王

盥

玉敦黍稷器也

若有賓客則從后

當贊后行事

大喪帥叙哭者亦

如之亦從后也

周禮冬官匠人曰內有九室九嬪居之外有九室九卿朝焉

禮記曰仲春之月玄鳥至以太牢祀于高禴天子親往后妃帥九嬪御乃禮天子所御帶以弧韜授以弓矢于高禴之前

又曰古者天子后立六宮三夫人九嬪二十七世婦八十一御妾

國語曰齊襄公卑聖侮士而唯女是崇九妃六嬪陳妾數百

漢書曰王莽備九嬪視九卿

魏志曰文帝增貴妃位次皇后

又曰文德郭皇后文帝踐祚為嬪甄后之死由后之寵也

王隱晉書曰武帝采諸葛冲等女五十餘人入殿賜采

女食皆憂不食楊后使設障謂曰可俱入障其中選者以絳
繫臂胡芳泣左右止之曰陛下聞之芳曰死不畏何畏陛
下帝壯其言故遂敬之芳父奮聞女中亦哭曰老奴不死
唯有二兒男在九地之下女在九天之上拜芳為貴嬪
晉書曰胡貴嬪名芳父奮泰始九年簡良家子女充於內拜
芳為貴嬪每有顧問不飾言詞率爾而答進退方雅最蒙愛
侍御服飾亞於皇后帝與樗蒲傷上指帝怒曰此固將種也
芳對曰北征公孫西拒諸葛非將種而何芳生平安公主

王隱晉書曰又採侍御史齊國左維女為修儀有文才
晉書曰左貴嬪名芬兄思芬少好學善綴文名亞於思
武帝聞而納之拜修儀後為貴嬪以才德見禮體羸多患
常居別室每遊華林輒回輦遊之語及文義辭對清華
左右侍聽莫不稱美及楊皇后崩芬敬獻誄咸寧三年
納悼后芬受詔作頌及帝女萬年公主薨帝痛悼不已
詔芬為誄甚獲恩賜焉重芬辭藻每有方物異寶必詔
為賦頌以是屢獲賜焉

晉諸公讚曰舊制貴嬪夫人比三公假金紫淑媛淑儀
修容修儀婕妤妍容華充華為九嬪比九卿假銀青

晉起居注曰秦始三年使使持節兼五官中郎將宗正
丞司馬恢拜崇陽采女李琰為淑儀王宣為修容徐琰
為修儀吳淑為婕妤妍趙琰為充華九年有司奏禮為皇
后聘以穀圭無妾媵拜授之制詔曰拜授可依魏氏故
事十年上臨軒使使持節兼太常洛陽令司馬啓拜采女胡
芳為貴嬪又使使持節兼御史中丞太子舍人馬誕拜

采女劉媛為淑妃臧曜為淑媛芳為淑儀趙粲為修華
陳琇為修容咸寧三年拜美人左嬪為修儀邢國為婕
妤朱華為容華

又曰惠帝元康二年詔曰才人謝玖進為淑妃有司奏
當與三夫人以下同拜詔宜在後也永寧元年詔拜為
貴人

後魏書曰高祖改定內宮三嬪視九卿六嬪視六卿
山海經曰鮒隅山顓頊葬於其陽九嬪葬於其陰

左貴嬪集有離思賦相風賦孔雀賦松栢賦泣漚賦有
納皇后頌楊皇后登祚頌芍藥花頌鬱金頌菊花頌神
武頌四言詩四首武元皇后誄萬年公主誄

世婦

周禮曰世婦掌祭祀賓客喪紀之事帥女官而灌概為
盥盛及祭之日蒞陳女官之具凡內羞之物

蒞臨也內羞房中之羞

周禮曰世婦每宮卿二人下大夫四人中士八人女府
二人女史二人奚十有六人

禮記月令篇曰仲春之月后親率九嬪御祠于高禘之前

又曰季春之月后齋戒親東嚮躬桑

禮記婚義曰古者天子二十七世婦以聽天下之內治以明章婦順故天下內治而家理

蔡邕月令章句曰仲春之月以太牢祀于高禘高禘祀名高猶尊也吉事先見之象也蓋為人所以祈子孫之祀也玄鳥感陽而至故於其至日因以用事簡狄以玄

鳥至之日有事高禘而生契焉故詩云天命玄鳥降而
生商后率九嬪御后者天子適妻也妃命也嬪婦也御
妾也周禮天子一后三妃九嬪二十七世婦八十一御
妻以應外朝公卿大夫之數也世婦不見卑者文畧御
妻皆行世婦可知也后妃將九嬪女御皆為禘以祈孕
姪也乃禮天子所御帶以弓韉天子所御謂后妃以下
至妾姪有萌芽者也韉弓衣也祀以高禘之命飲之醴
酒帶以弓韉尚使得男也授以弓矢於高禘之前弓矢

者男子之事也

又曰季春之月后妃齋戒親東嚮躬桑齋戒者事於先蠶也東嚮盛德在木也躬桑手三縑猶天子親耕三推也古者天子諸侯必有公桑蠶室近川而為之築宮僅有三尺棘墻而外閉之卜夫人世婦之吉者使之蠶室奉種浴于川公桑食之蠶事既升升成也分繭稱絲效功絲以斤兩故曰稱知其多少旌其成功也事在孟夏於是終言之也以供郊廟之服天子諸侯所服以致祭者必后夫人所親蠶也禮世婦卒蠶獻

繭於夫人夫人親受之繅三盆手朱綠之玄黃之以為黼黻
文章君服之以祀先王先公敬之至也故曰無敢怠承
又曰孟夏之月蠶事既畢后妃獻繭於天子進其成功
也乃收蠶稅以桑為均十而取一曰稅乃收世婦以下
所蠶之稅也以桑為均者用桑多則繭多少則繭少也
貴賤長少如一貴謂世婦賤謂妾御長謂力壯者也年
無尊卑老壯各自以桑為均不得高下為差也

史記曰中宮天極星後勾陳四星末大星正妃餘三星後

宮之屬也

漢書曰軒轅前大星女主象旁小星御者後宮屬也

范曄後漢書曰世婦主知喪祭賓客

後魏書曰高祖改定內宮世婦視中大夫

又曰宣武靈皇帝胡氏初召入掖庭為承華世婦生肅

宗明皇后

宋書宋武帝建德中詔曰正位於中有聖通典質文相
草損益不同五帝則四星之象三王立六宮之數劉曹

已降等級彌繁選擇遍於生民命秩方於庶職椒房丹地有衆如雲本由嗜欲之情非闕風化之義朕運當澆季思復古始無容廣集子女屯聚宮掖弘贊後庭事從約簡可置妃二人世婦三人御妾三人自茲以來宜悉減省

女御

周禮天官冢宰曰女御

昏義所謂御妻御猶進也侍也

范蔚宗後漢書曰八十一御妻序於王之燕寢頒官分務各有

典司

後漢書曰高祖定內宮御女視元士

淮南子曰孟春之月東宮女御青色衣青絲鼓琴孟夏之月南宮女御赤色衣赤絲吹笙竽孟秋之月西宮女御白色衣白絲撞白鐘孟冬之月北宮女御黑色衣黑絲擊磬石

美人

漢書曰漢興因秦之稱號正適稱皇后妾皆稱夫人及

有美人之號焉至武帝各有爵位美人視二千石

又曰萬石君奮其父趙人也姓石氏趙亡徙居溫過河
內時奮年十五為小吏侍高祖高祖與語愛其恭敬問
曰何有對曰有姊能鼓琴高祖曰若能從我乎曰願盡
力於是高祖詔其姊為美人徙其家長安中戚里以姊
為美人故也

又曰孝惠章皇后宣平侯敖女呂太后欲為重親以公
生女配帝欲其生子萬方終無子迺使佯為有娠取後

宮美人子名之殺其母立所名子為太子

又曰孝成趙皇后弟絕幸為昭儀謂成帝給我言從宮
中來即從中宮許美人兒從何生許氏竟當復立耶今
許美人有子竟負約謂何帝曰約以趙氏故不立許氏
使天下無出趙氏上者無憂也

范曄後漢書曰夏殷以上后妃制其文略矣周禮王者
備內職焉光武中興置美人無爵秩歲時賞賜充給而
已

又曰虞美人者以良家子十三選入掖庭生舞陽長公主自漢興母氏莫不尊寵順帝即位加美人爵號而冲帝早夭梁冀秉政忌惡他族虞氏抑而不登但稱大家而已

又曰王美人趙國人也豐姿色聰敏有才能明書會計以良家子應法相選入掖庭為何后所醜靈帝思美人作追德賦令儀頌

魏志曰漢制內官十有四等魏因漢法皆如舊制自夫

人以下世有增損太祖建國始命王后其下五等有美人暨太和中自夫人以下爵凡十三等美人視二千石江表傳曰孫皓以張布女為美人有寵後美人忤皓怒棒殺之

沈約晉書曰夏殷以上內職無聞姬氏之寵婦官為戚前漢列終十四世祖受命又有美人以比職焉

後魏書曰高祖改定內官美人視三品

沈約宋書曰晉武帝採漢魏前事之制置三夫人其餘

有美人視爵千石太祖以美人為散職

蕭子顯齊書曰六宮位號漢魏以來因寵增置世不同矣建元元年有司奏置美人為散職

才人

范曄後漢書曰和帝數失皇子鄧后憂繼嗣不廣數選進才人以博帝意

魏志曰明帝遊北園召才人以上曲宴極樂明日帝見王后后曰昨遊宴北園樂乎帝以左右泄之殺十餘人

魏略曰明帝青龍三年於別殿之北置美人六人方諸才人以上

王隱晉書曰太康七年出後宮才人妓女已下百七十人歸家

又曰初惠帝幼時世祖遣才人謝玖侍惠帝因而有娠臨娶賈妃迎玖西宮遂生愍懷太子

臧榮緒晉書曰懷帝王太后諱媛姬初武帝中拜才人早卒懷帝即位追尊曰皇太后也

晉中興書曰謝夫人名玖家本貧賤又以屠宰為業玖清
惠貞正有淑姿選入後宮為才人

後魏書曰高祖置女職中才人視四品

沈約宋書曰晉武帝採漢魏之制置才人中才人爵視
千石以下高祖受命置二十人世祖又置中才人以為
散位

崔鴻十六國春秋後趙錄曰石虎杜皇后名珠不知何
許人平幽州入在王浚籍中虎見而悅之因請於勒勒

引見拜才人以賜虎性恭惠柔婉寵幸亞於鄭后也

保林

漢書曰元帝加昭儀之號凡十四等保林視百石

晉武帝起居注曰今出掖庭諸才人保林以下二百七十餘人

女侍中

後魏書曰高祖置女侍中視三品

又曰陸昕之容貌柔謹尚獻文女常山公主高祖以其

主婿持垂昵暱所之亡公主奉姑有孝稱神龜初與穆氏瑯琊公主並為女侍中

又曰于忠後妻中山王女微解書計靈太后引以為女侍中

又曰靈太后妹為元義妻封平原郡君拜女侍中

鄴中記曰石虎置女侍中皆貂蟬侍直皇后

女尚書

魏畧曰明帝遊宴在內選女子知書可付信者為女尚

書

魏書曰高祖置女尚書視三品

晉東宮舊事曰迎太子妃之日諸長御皆在幄帳左右侍宮人重行北面以准女尚書西面以准女侍中

陸翹鄴中記曰石虎征討所得美女萬餘以為宮人簡其有才藝者為女尚書

女史

毛詩曰靜女刺時也衛君無道夫人無德也靜女其嬈

貽我彤管

既有靜德又有美色又遺我以古人之法可

兩環進退也

以配人君者后夫人必有女史書其日月以

之著於左手既御著於右手事無大小記以成法箋云

赤貌彤管有煒悅懌女美煒赤貌箋云赤管煒然女

赤貌

彤管有煒悅懌女美

史以悅懌妃妾之德美之

也至

毛詩義疏曰女史彤管法如國史主記后夫人之過人

君有柱下史后有女史外內各有官也

周禮曰女史掌王后之禮職

女史女奴曉書者

掌內治之貳以

詔后治內政

內治之法本在內掌書而貳之

逆內宮

鈞考六宮之計

書內令

后

令凡后之事以禮從亦如太史之於王

漢書曰班婕妤自傷賦曰陳女圖以鏡鑒兮顧女史而

問詩

范曄後漢書曰頒官分務各有典司女史彤管記功書
過

晉記曰元康中司空張華懼后族之盛乃作女史箴

沈約宋書曰太宗留心後房擬外百官備置內職置後

宮校事女史一人又紫極中監女史一人又光興中監

女史一人又贊樂女史一人又中訓女史一人官品皆
第四

後魏書曰高祖置女職女史女賢人視三品

崔鴻十六國春秋後趙錄曰石虎置女太史於靈臺仰
觀灾祥以考外太史驗察虛實

太平御覽卷一百四十五